



**Sumáriu Kazu
Tribunál Distritál Suai
Períodu Fevereiru 2019***

Afirmasaun: Sumáriu Kazu ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba violénsia hasoru fetu.

A. Sumáriu prosesu julgamentu kazu iha Tribunál Distritál Suai

1. Totál kazu ne'ebé JSMP monitoriza : 14

Artigu	Tipu Kazu	Númeru
Artigu 145 Kódigu Penál (KP) no konjuga ho artigu 2, 3, 35(b) no 36 LKVD	Ofensa ba integridade fízika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku)	2
Artigu 172 no 173 KP	Violasaun seksuál ho agravasaun	2
Artigu 23 no 173 KP	Tentativa violasaun seksuál ho agravasaun	1
Artigu 23 no 172 KP	Violasaun seksuál	1
Artigu 177 KP	Abuzu seksuál ba menór	1
Artigu 178 KP	Aktu seksuál ho adolexente	1
Artigu 252 KP	Furtu agravadu	1
Artigu 211 KP	Arma proibida	1

* Numeru kazu ne'ebé julga iha TDS menus tanba tribunál infrenta dezafiu sira hanesan menus konbustivel ba transporte inklui transporte operacional rasik avaria nune'e tribunál la bele notifika parte sira hodi tuir julgamentu. Aleinde ne'e, tribunál distrital sira tantu TDS agora dadaun la realiza tribunál movel ne'ebé mós fó impaktu kazu menus iha TDS.

Artigu 211 no 218 KP	Arma proibida no espésie amesada ka ho perigu atu hotu	1
Artigu 316 KP	Kontrabandu	2
Artigu 231 no 237 KP	Kandidatu inelejivel no fraude iha votasaun	1
Totál		14

2. Totál desizaun ne'ebé JSMP monitoriza : 1

Tipu Pena	Númeru
Suspensaun ba prizaun nia ezekusaun (artigu 68 KP)	1
Totál	1

3. Total kazu sira ne'ebé adia tuir JSMP nia monitorizasaun : 3

Razaun adiamentu	Númeru
Tribunál la notifika parte sira tanba kareta operacional avaria	2
Arguidu sira la marka prezensa tanba laiha transporte	1
Totál	3

4. Totál kazu sira ne'ebé sei kontinua tuir JSMP nia monitorizasaun : 10

B. Deskripsaun sumariu ba desizaun kazu sira ne'ebé JSMP monitoriza:

1. Krime ofensa ba integridade física simples ho natureza violénsia doméstika

Nú. Prosesu : 0002/18.BBCLC
 Kompozisaun Tribunál : Singulár
 Juis : Dr. Samuel da Costa Pacheco
 Prokuradór : Dr. Napoleão Soares da Silva
 Defeza : Dr. Manuel Amaral
 Tipu pena : Pena prizaun tinan 1 fulan 6 suspende ba tinan 3

Iha 13 Feveiru 2019, Tribunál Distritál Suai prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu JM hasoru nia feen, iha Distritu Bobonaro.

Akuzasaun Prokuradór

Prokuradór akuza katak iha 31 Janeiru 2018, oras tuku 01:00 madrugada, lezada fó susu hela ba nia oan bebe ne'ebé foin halo fulan haat, arguidu hadeer no husu ba lezada atu halo relasaun seksuál, maibé lezada rejeita tanba labarik sei ki'ik, no foin mak fulan haat. Bainhira arguidu rona lezada hatan hanesan ne'e, arguidu deskonfia lezada iha relasaun ho mane seluk no

arguidu basa dala ida iha lezada nia matan parte loos, tuku dala ida iha kakorok no tebe dala ida iha lezada nia tilun-hun parte karuk nune'e rezulta lezada monu ba rai. Bainhira lezada monu tun ba iha rai, arguidu kontinua sama tan lezada nia kakorok. Aktu hirak ne'e, rezulta moras no bubu iha lezada nia matan, kakorok, kotuk-laran no tilun-hun konforme atestadu médiku hosi Pradet.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa katak nia baku duni lezada hanesan faktu sira iha akuzasaun prokuradór nian maibé ho razaun tanba lezada haree televizaun no la haree labarik tanis. Arguidu arrepende ninia hahalok, sei hakarak kontinua moris hamutuk ho lezada hanesan feen-laen no promete sei la halo tan krime ne'e iha futuru.

Entretantu lezada kontinua konfirma faktu sira iha akuzasaun prokuradór nian no deklara katak lakohi simu arguidu hanesan nia laen ona tanba antes ne'e arguidu no nia feton sira sempre baku lezada no duni lezada husi uma. Tanba ne'e, bainhira kazu ida ne'e akontese lezada hela tiha iha uma mahon hodi hetan protesau. Durante lezada iha Uma Mahon mós arguidu nunka ba haree lezada ho nia oan nain rua.

Alegasaun finál

Prokuradór konsidera arguidu provadu komete krime hasoru lezada tuir faktu sira iha akuzasaun. Prokuradór mós haktuir katak mezmú arguidu ho lezada dadauk ne'e hela separadu maibé atu halo prevensaun ba iha futuru, prokuradór husu ba tribunál atu kondena arguidu ho pena prizaun tinan ida no selu kustu judisiál US\$25.00.

Entretantu, defeza husu ba tribunál atu kondena arguidu ho pena ne'ebé justu no adekuada tanba arguidu konfesa, arrepende ba nia hahalok no promete sei la halo tan iha futuru.

Desizaun

Depoide avalia faktu sira hotu, tribunál prova katak arguidu komete duni krime ofensa ba integridade fízika simples tuir faktu sira iha akuzasaun prokuradór nian. Bazeia ba faktu provadu hirak ne'e no tetu ba sirkunstánsia hotu-hotu ne'ebé asosiadu ho krime ne'e, tribunál kondena arguidu ho pena prizaun tinan ida fulan neen suspende ba tinan tolu, inklui kondena arguidu selu kustu judisiál US\$50.00.

Atu hetan informasaun kle'an liu tan favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.tl

info@jsmp.tl

Telefone:3323883